

嘉慶廬州府志

廬州府志卷三十七

僑寓

梅福 鄧暉 施延 孫策

魯肅 王祥 王覽 鮑照

畢誠 淩策 謝枋得 蔡章

齊克讓 沈純 李信 陳壽

夏煜 黃子順 羅捧日 方誠

杜繩甲 熊嘉夢 陳上善 余思復

沙白 張芳傳 張化鳳 夏嘉賓

魏侯聘

廬州府志卷三十七

賜進士出身廬州府知府溫陵張祥雲主修

僑寓

漢

梅福字子真九江壽春人也少學長安明尚書穀梁春秋爲郡文學補南昌尉後去官歸壽春歟因縣道上言變事求假輅傳前行在所條對急政輒報罷是時成帝委任大將軍王鳳鳳專執擅朝而京兆尹王章素忠直譏刺鳳爲鳳所誅王氏浸盛災異數見羣下莫敢正言福上書不納成帝久亡繼嗣福以爲宜建三統封孔子之世以爲殷後遂下詔封孔子世爲殷紹嘉公福居家常以讀書養性爲事

至元始中王莽顓政福一朝棄妻子去九江至今傳以爲
仙其後人有見福於會稽者變名姓爲吳市門卒云

漢書

列傳

康熙志梅福嘗讀書於舒城之梅山

到惲字君章汝南西平人也年十二失母居喪過禮及長理
韓詩嚴氏春秋明天文象數王莽時寇賊羣發惲迺仰占
元象歎謂友人曰方今鎮歲災或竝在漢分翼軫之域去
而後來漢必再受命福歸有德如有順天發策者必成大
功時左隊大夫遂竝素好士奇之使署爲吏惲不受署西
至長安迺上書王莽曰智者順呂成德愚者逆呂取害神
器有命不可虛獲上天垂戒欲悟陛下令就臣位轉禍爲

福若不早圖是不免於竊位也莽大怒卽收繫詔獄劾以大逆猶以憚據經識難卽害之會赦得出迺與同郡鄭敬南迺蒼梧建武三年又至廬江因遇積弩將軍傅俊東徇揚州俊素聞憚名迺禮請之上爲將兵長吏憚恥以軍功取位遂解歸鄉里久之太守歐陽歛請爲功曹憚言忤歛去遂客居江夏教授郡舉孝廉爲上東城門候帝常出獵車駕夜還憚拒關不出帝令從者見面於門問憚曰火明迺遠遂不受詔帝迺迴從東中門入明日憚上書諫賜布百匹再遷長沙太守後坐事左轉芒長又免歸避地教授著書八篇以病卒子壽

漢書列傳

施延沛國人

康熙志
新縣人

嘗避地廬江種瓜爲業明五經星官風

角家貧母老周流傭賃順帝知其賢徵拜太尉年七十六

卒 明隆慶志

孫策字伯符父堅初興義兵策將母徙居舒與周瑜相友收合士大夫江淮間人咸向之堅薨從袁術術甚奇之常歎曰使術有子如孫郎死復何恨策乞平定江東術表策爲折衝校尉殄寇將軍策渡江轉鬪所向皆破莫敢當其鋒遂引兵渡浙江據會稽更置長吏自領會稽太守時袁術僭號策以書絕之曹公表策爲討逆將軍封吳王建安五年曹公與袁紹相據於官渡策陰欲襲許迎漢帝未發會爲故吳郡太守許貢客所殺 三國志吳列傳

魯肅字子敬臨淮人富於財性好施與時周瑜爲居巢長將

數百人故過候肅并求資糧肅家有兩囤米各三千斛肅乃指一囤與瑜瑜益知其奇遂相親結袁術聞其名就署東城長肅見術不足與立事乃攜老弱南到居巢就瑜瑜東渡因與同行畱家曲阿會祖母亡還葬東城畢還曲阿瑜已徙肅母到吳時孫策薨權尙住吳瑜因薦肅才宜佐時權見肅與語大悅之曹公向荊州權得曹公欲東之問與諸將議皆勸權迎之肅獨言不可權歎息曰此諸人持議大失孤望今卿廓開大計正與孤同此天以卿賜我也遂召瑜任以行事以肅爲贊軍校尉助畫方略曹公破走瑜病因上疏曰魯肅智略足任乞以代瑜卽拜肅奮武校尉代瑜領兵初住江陵後下屯陸口威恩大行衆增萬餘

人拜漢昌太守偏將軍建安二十二年卒

三國志吳列傳

晉

王祥字休徵琅琊臨沂人性至孝早喪親繼母朱氏不慈數譖之由是失愛於父每使掃除牛下祥愈恭謹父母有疾衣不解帶湯藥必親嘗母常欲生魚時天寒冰凍祥解衣將剖冰求之冰忽自解雙鯉躍出持之而歸母又思黃雀炙復有黃雀數十飛入其幕復以供母鄉里驚歎以爲孝感所致焉有丹柰結實母命守之每風雨祥輒抱樹而泣其篤孝純至如此漢末遭亂扶母攜弟覽避地廬江隱居三十餘年不應州郡之命母終居喪毀瘁杖而後起徐州刺史呂虔檄爲別駕委以州事于時寇盜充斥祥率屬兵

士頻討破之州界清靜政化大行舉秀才除溫令累遷大司農高貴鄉公卽位與定策功封關內侯拜光祿勳轉司隸校尉從討卅邱儉遷太常封萬歲亭侯天子幸太學命祥爲三老武帝踐阼拜太保進爵爲公祥固乞骸骨詔聽以睢陵公就第位同保傅在三司之右祿賜如前泰始五年薨諡曰元

晉書列傳

王覽字元通祥異母弟母朱遇祥無道覽年數歲見祥被楚撻輒涕泣抱持諫其母母爲少止凶虐覽孝友恭恪名亞於祥及祥仕覽亦應本郡之召

康熙志

宋

鮑照字明遠東海鄉人曾居合肥梁縣鄉讀書臺在焉

康熙

志

唐

畢誠字存之河南偃師人嘗讀書於舒城主簿山今主簿原是也官翰林學士宣宗訪以邊事條對甚悉帝悅曰吾方擇帥孰謂頗牧乃在吾禁中耶拜邠寧節度使相懿宗

熙志

宋

凌策字子奇宣州涇人世給事州縣策幼孤獨厲志好學與姚鉉同學於廬州雍熙二年舉進士起家廣安軍判官改西川節度推官淳化三年就命爲光祿寺丞簽書兩使判官代還拜右贊善大夫通判定州李順之亂川陝選官多

憚行策自陳三莅蜀境諳其民俗卽命知蜀州徙緜州入爲戶部判官遷都官判三司三勾院出知揚州時洪州水知州李元病上與宰相厯選朝士王旦言策莅事和平可寄方面卽以江南轉運使授之五年召拜右諫議大夫集賢殿學士知益州九年自蜀代還拜給事中權御史中丞尋遷工部侍郎卒錄其子將作監主簿璫琬竝爲奉禮郎

宋史列傳

謝枋得字君直江西弋陽人宋亡隱於濡須之南鄉

志

元

蔡章洛陽人官閩省員外郎至正丁未與省官七家同舟泛海北歸行海中三月俄有一魚大如舟尾之而行榜人震

恐章焚香告天曰某自幼業儒惟知忠君孝親未嘗以私害人所載惟先人遺像書籍而已別有賊私任天淪溺祝畢丹裂爲三其二竟沈章與家人憑其一漂流七日從台州登岸至舒城時洛中道梗遂定居焉

康熙志

明

齊克讓山東高河人元天歷間以學行發身官至中書省右丞相明太祖平一天下以克讓爲賢命徙濡須魚米之地以養其老子孫世籍

康熙志

沈純浙江長興人永樂間授合肥令陞刑部主事愛合肥湖山之勝買田以居有楹帖云一版書香從浙水五花官誥寄淝川殊令人想其恬曠也

康熙志

李信雲南建水人鄉進士官武昌同知謝任寓舒城性簡靜

杜門不出以詩酒自娛

康熙志

陳壽字本仁江西新淦人成化進士官南京兵部侍郎徙家合肥正德壬申流賊之亂官軍躡其後所過侵掠壽嘗以都御史經略邊鎮官軍向隸麾下至合肥聞壽在邑中猶凜凜畏戢秋毫不犯壽歷官四十餘年大半在散地廉聲素著宦橐蕭然諸子旅寓至無以供具壽都不介意作詩曰買田陽羨原無計問族舒廬舊有因癡兒能識癡翁意但道歸來不道貧詳見吾學編

康熙志

煜句容人至正間與孫炎等同隱居負詩名明初應詔授

博士遷鎮廬江遂卜宅於岫山口世聚族焉

縣志

鳳州府志卷三十一
黃子順字叔和休寧人明末僑廬江遂家焉邑經兵燹疫癘
盛行積尸橫野子順市棺掩骼繼以蓆蓆且盡掘坑座之
賑粥施藥活人甚眾

縣志

羅捧日字爾升號丹霞徽州府諸生明季寄居無爲通天文
地理術數之學善詩尤工於詞有辛稼軒劉改之之風死

葬桃花嶺

州志

方誠字次公桐城人少高放通六經工詩畫旁善岐黃之術
診治多奇驗寄居舒城之桃谿著有蘭皋集行世

縣志

國朝

杜純甲蜀人安廬兵備參議性清約食未嘗兼味人不敢干
以私後解綬隱於廬之朝霞山吟嘯不輟與文士講布衣

之歆 縣志

熊嘉夢字魁吾三韓人寄居無爲嘉夢束髮從戎官至都督
多戰功平生不苟嘖笑與士卒同甘苦所在人思之 州志

陳上善字元水晚號盤谷老人吳人以避亂徙家南昌少與
曹能始王季重文湛持諸先生倡和或云曾官中書及縣
令工古文詞及丹青篆寓濡須最久山水古蹟多經題

咏 州志

余思復字不遠福建將樂人工詩尤善書法客遊近三十年
寓住濡須最久著有吳遊草 州志

沙白字定峰江陰人以諸生入太學官爲宛平王大宗伯崇
簡掌書記康熙癸丑歸自京師遂渡江訪其族第可續於

濡須留住久之郡中古迹多所通咏

州志

張芳傳字蘭曉直隸宛平人貴筑令祖國禎知無爲課士勸

農州民愛之後陞江西廣信知府告歸遂寄居合肥

縣志

張化鳳字羽皇河南河內縣人在廣東連山令終養歸道經

巢邑遂家焉嘗督修浮橋捐白金三百又鼎建塔影庵于

沈耳池樹如來柱于釣魚臺其他施藥施棺卹孤濟困善

行甚多積借券千餘金易質時悉焚之

縣志

夏嘉賓字君尙新安人隨其父貿易于巢遂居焉嘉賓忠信

誠篤樂善好施人稱長者子孫五世同居尤爲盛事

縣志

魏侯聘字爾賓崇明貢士任巢縣教諭罄囊以修學校去官

後貧不能歸諸生爲代卜居于巢遂家焉

縣志

廬州府志卷三十八

仙釋

王子喬

魏伯陽

左慈

長慶道巖禪師

無爲鐵佛因禪師

廬州開光宗禪師

慧滿禪師

三刀禪師

義了道人

崔之道

崔自然

伏虎禪師

春秋山二禪

李景儒
釋道川

周真人

清慧禪師

妙果禪師

合肥僧了然

五乳和尚

可靜禪師

博山禪師

無爲古城僧

隱明和尚

吳崇信

張以傑

徐謙三

常樂寺僧

林道人

周和尚

李虛庵

行瑛

翟道人

釋星朗

石門

通達和尚 戒傳

廬州府志卷三十八

賜進士出身廬州府知府溫陵張祥雲主修

仙釋

周

王子喬周靈王太子晉也好吹笙作鳳鳴遊伊洛開道士浮邱公接上嵩山常遊巢陵金庭紫薇之勝煉丹洞口拔劍刺地湧泉至今遺蹟猶存楚辭遠遊篇云軒轅不可追攀兮吾將從王喬而娛戲願飆風以縱遊兮至南巢而一息

康熙志

漢

魏伯陽煉丹於合肥四頂山中所著有參同契深悟易理伯

陽自敘會稽鄙夫幽谷朽生挾懷朴素不樂權榮棲遲僻陋忽略利名執守恬澹希時安平晏然閒居迺譔斯文歌敘夫易三聖遺言察其旨趣一統其倫務在順理宣耀精神潛化流通四海和平表以爲力萬世可循序以御政行之不繁引內養性黃老自然含德之厚歸根返元近在我心不離己身抱一毋舍可以長存

明隆慶志

左慈字元放廬江人也少有神道嘗在曹操坐操從容顧眾賓曰今日高會珍羞略備所少吳松江鱸魚耳元放曰此可得也因求銅盤貯水以竹竿餌釣於盤中須臾引出皆長三尺餘操又曰旣已得魚恨無蜀中生薑耳放曰亦可得也操因曰吾前遣人到蜀買錦可過勅使者增市二端

語頃卽得葢還并獲操使報命後曹出近郊士大夫從者
百許人慈齋酒一升脯一斤手自斟酌百官莫不醉飽操
怪之使尋其故行視諸鎮悉亡其酒脯矣操懷不喜因坐
上欲收殺之慈乃卻入壁中霍然不知所在

後漢書方術傳

唐

長慶道巖禪師廬州人初侍光孝便領悟微言卽於湖南大
光山剃度暨化緣彌盛出住長慶上堂彌勒朝入伽藍暮
成正覺說偈曰三界止下法我說皆是心離於諸心法更
無有可得看他恁麼道也太殺惺惺若比吾徒猶是鈍漢
所以一念見道三世情盡如印印泥更無前後諸子生死
事大快須薦取莫爲等明業識忙忙盡爲迷已逐物世尊

臨入涅槃文殊請再轉法輪世尊咄曰吾四十九年住世
不曾說一字汝請我再轉法輪是吾曾轉法輪耶然今時
衆中建立億萬主問答事不獲已蓋爲初心耳僧問如何
是長慶境師曰聞黎履踐看問如何是佛法大意師曰今
日三月三日學人不曾師日止止不須說我法妙難思便
下座咸平二年示寂

明隆慶志

無爲鐵佛因禪師僧問如何是和尙家風曰一尋寒水自爲
鄰二事秋雲更誰識進曰和尙家風蒙指示爲人消息又
如何師曰新月有圓夜人心無滿時

明隆慶志

廬州開光宗禪師上堂說偈曰一不做二不休振轉鼻孔捺
下雲頭禾山解打鹽官鼓僧繇不爲戴嵩牛廬陵米投子

油雪峯依舊鞦雙毬夜來風送衡陽信寒鴈一聲霜月幽
明隆慶志

慧滿禪師貞觀間結菴於合肥大蜀山嘗誦法華經忽有白衣造門曰我東海龍王少子也聞梵音特來聽法時適苦旱僧令其降雨荅曰盜布天澤當殛死師曰汝捨此身以救民我誦此經以度汝言畢不見須臾膏澤滂沱越三日有龍死於山隅師收而葬之民爲立祠其后水旱祈之必驗

明隆慶志

三刀禪師唐末居廬江顯寧院黃巢之亂爲賊所執斫之三刀無血世號三刀禪師

明隆慶志

義了道人合肥鍾離氏子嘗爲進士去從浮屠學名所居爲

昨夢齋吳正仲有詩云不受塵網纏祝髮趨幽屏同視眞
夢事超然得深省寂照涵虛空夢覺等前境

輿地紀勝

崔之道舒城人爲滿山眞元宮道士嘗見二仙人對弈與一

弈子命吞之自此言禍福輒應後尸解

明隆慶志

崔自然巢縣人少學道得服松脂法後隱於城南洞中辟穀
修煉冬大雪常於溪中澡浴每入山虎豹見之皆蹲伏一
日謂其徒曰我爲仙官所召言訖而遁後有人自豫章來
者見之於道疑蟬蛻云今石牀藥鼎尙存

明隆慶志

伏虎禪師不知何許人亦無姓名昭宗光化三年結庵冶父
山絕頂賜號孝慈伏虎禪師及吳王楊行密捨宅名光化
寺請居之師厭其囂雜天復二年別搆一庵於冶父之陰

弟子受戒者八百餘人

康熙志

春秋山二禪熙寧中石亘記云余嘗遊春秋山有二禪之像存焉世傳二人者繼隱於此蛻形以去

輿地紀勝

宋

李景僊祥符中道士居天慶觀聚書萬卷時玉清昭應宮成求道書於天下迎居昭應後遣歸景僊之兄名僊芝登進士有弟爲僧名智曇時稱李門三教

州志

釋道川崑山狄氏子初爲縣之斗級聞東齊謙首座爲道俗演法往從之習禪一日因不法遭笞忽於杖下大悟遂出家依謙命名道川且謂之曰汝舊名狄三今名道川川卽三耳汝能豎起脊梁了辯佛事其道如川之增若放倒則

依舊狄三也建炎初叅謁庵於天封機鋒投契精通金剛

般若經後主冶父法席

縣志

元

周真人住羣僊觀善醫藥及相地樞密王公識之後遇許真

君從之遊不知所終

縣志

清慧禪師名法雲字湛然至正間開演御講特封國師清慧

其賜號也初住合肥明教寺後住無爲報恩寺爲開山第

一代法祖遺塔在城南三里孔道旁碑碣尙存

州志

妙果禪師自號無住翁饒之樂平人嘗發願云吾今生不作

佛當入無間地獄東遊四明天台浮梁諸山歸憩於巢邑

民柳氏割山地建蘭若以棲師手創一塔是夜有光如正

練自天際散於五峯之頂三夕乃止居民數十里聚觀咸
駭異之

康熙志

明

合肥僧了然居西門外三里庵目不識字口不譚經年七十
九一日跌坐說偈曰我今去我今去不向幽泉一條路直
上西方見如來好認從來真面目言畢而寂

縣志

五乳和尚上恩弟子德璞傳臨濟宗住錫大蜀山開福寺闢
草建刹復振慧滿宗風人咸重之

縣志

可靜禪師居廬江大隆寺洪武初考選天下名僧第一賜錦
綢袈裟紫金盃孟永樂間遣御史白玉修其墓

康熙志

博山禪師名大穢俗姓沙舒城西關人十五歲棄家爲僧師

新城壽昌於大好山中先是艤遇印宗示以沒蹤蹟處沒
藏身藏身處卻沒蹤蹟叅近二十餘年無得一日閱傳燈
錄趙州囑僧語始省走質壽昌深思兩月而黃如紙坐盤
石上聞護法神倒地遂覺豁然命叅龍吟虎嘯公案師引
筆疾書云般活乎雄各有奇糗糊肉眼曷能知此光不會
時流意依舊春風逐馬蹄壽昌顧之笑曰今方知吾不汝
欺也厥後宗教大振爲世導師還舒省墓浮江至金陵說
法歸而謝世

康熙志

無爲古城僧了然受戒於鴻茲澹公不食鹽醬日誦經以無
念爲宗年七十四一日坐龕中自令封識三年後啟視之
貌如生臂可屈伸衣履潔淨大寂驚異競布金莊嚴之

康

熙志

陳明和尚濡須人年十五入滿之華嚴庵受戒苦行三年澹齋十二年閉關六年透悟宗風目不識字出口成偈著消飯集一帙冬日取寒泉漱浴常汗出圓寂後三年體不壞顏面如生

康熙志

吳崇信無爲道士嘗遊長沙傳毛真人雷法能驅役鬼神祈禱甚驗

江南通志

張以傑江西南昌人正德初年十七至合肥白鶴觀闢道修真衆欽法之尤善祈禱符籙

康熙志

徐謙三吳鄉人善符籙能驅風雷郡邑旱請禱立沛太守龍詰贈詩云心上眞機旋造化掌中神術滾風雷

康熙志

常樂寺僧合肥北鄉人隆慶閒修淨土業苦行數十年積薪甚高莫喻其旨一日沐浴解大袂端坐其上語貌如常眾環伺之僧張目曰何須爾俄見青碧微光騰騰若電自口鼻中迸出燔其軀頃刻立盡獲舍利數十粒惜逸其名

康熙志

林道人永貞觀羽客也蹤蹟詭秘人莫能測每得錢與數丐傳瓢而飲終日酣酣箕踞而已亦莫問其鉛汞刀圭之術同輩惡之莫與爲伍臨終白日冲舉至今名其橋曰昇仙

康熙志

周和尚世居山溪間正統閒試天下僧居第二通書史誦天文地理韓襄毅公征西周披袈裟叅謀軍事韓出對云和

尚挂紅穿綠非莊嚴實則莊嚴周應聲曰大人衣紫腰金
素富貴行乎富貴憚方山以梅花百韻令和一分吟成

志

李虛庵廬江人寓居六安行導引術虎皮張真人密度之張
自言出西域轉北洲還中國止度得虛庵一人見天仙直

論縣志

行瑛爲景福寺僧正博通佛書能以己意化導人嘗捐貲百
餘金裝塑佛像一日往遊京師回囑其徒以後事實目百
日遂示寂人以爲得道云

州志

翟道人遼人故某將軍部卒不知其道術所由得嘗從將軍
出行邊路半忽失之凡物色數日而後得則入定於馬上

也萬歷閒吳少司馬光義攜自陝西寓無爲西門外謝家莊二年或數日不食或盛夏據大石長臥赤日中至七八日處暗室未嘗需燈以水漱口飲病者輒愈與人語在顯密之間崇禎丙子道人在燕西山中司馬遣使迎之荅曰我常有書來旬日閒正陽門道上忽小僮投一札司馬自與中閒視之止知足不辱四字司馬乃挂冠而歸

州志

國朝

釋星朗閩漳龍溪林氏子舉天啟丁卯鄉試仕屯部郎出守肇慶渡揚子江叅天界博山和尚深領法要於是棄官薙髮徧歷名山巨剎後至廬江卓錫治父祖庭寺寺旁有古樹一株枯而復榮遂於亂榛中新建殿宇四方學者雲集

康熙癸丑春樹忽萎倒溪中星朗曰樹倒老僧行矣沐浴更衣跣趺說偈而逝

康熙志

石門踰廣人國初杖錫來濡須居西城茶庵面壁之餘輒發吟詠蓋亦避世而逃於禪者著有野敲集一帙其山居詩云小結茅庵隱竹松當門潭靜足潛龍明霞晚落紅如火芳艸春生綠遍峯茶熟砂鑪和月煮蕨肥石臼帶雲舂眼中不見興亡事盡付溪山半夜鐘

州志

通達和尚不知何許人康熙五十年閒來土橋鎮寄居城隍廟粒食絕不入口惟日飲水三十餘升夜則誦經達旦如是者近十日忽買薪積平原僻處端坐其中引火自焚瞑目誦佛號而化鎮人異之卽其地建塔竝爲立廟以祀之

州志

戒傳字大文藏佛岩天池庵僧乾隆間景福寺眾僧延請住持本寺戒傳見其殿宇傾頽寮房毀敗乃發願站關募修廢寢處者一載形容自若後州人共延之出關數日跏坐而逝

州志

廬州府志卷三十九

賜進士出身廬州府知府溫陵張祥雲主修

列女 貞孝

宋

張勝女奴兒合肥人淳熙十一年冬母病劇奴兒割股肉以食母病遂愈淳熙十二年知廬州軍事王希呂以其事聞於朝遂刻石

元

高歷妻張氏廬江人母病目喪明氏歸省抱母而泣以舌舐之忽復能視州縣以狀聞褒美之

明

張亮女舒城人年十歲餘亮疾甚女禱於神刲股以進其兄孟奎孟卒及其姊亦刲股和藥以療父疾竟瘳

國子生李禹女秀眞無爲人幼聰慧頗知書史隨父在南雍父以疾告歸卒於道眞哀痛嘔血死一時士大夫咸哀之陸葛鵬妻侯氏合肥人姑周氏病亟忽思肺羹氏于午夜引刀刲腹割肝葉寸許復刲右股肉和糜進之姑病遂愈氏創亦尋合人稱奇孝

隱士郭嘉禎妻程氏舒城人姑周氏病刲股奉姑姑愈其姊傅氏值姑復病亦刲股奉姑亦愈後程病長子萬化妻胡氏亦刲股以療次子萬里妻葛氏亦然萬化子生員士亮值母病亦刲股療萬里病其次妻蔡氏及其子生員士豪

亦割股療之一門之中忘身事親者得七人焉

以上崇禎

志

陸某妻侯氏合胞人嘗割肝以療姑病

周振鼎妻崔氏合胞人負姑避難行三十里姑病急倉卒中
剖肉爲羹進之立愈年七十始出刀痕以示子孫

潘孟禮二女舒城人宣德閒姊以目疾不字妹誓與俱養親
終老於家壽俱八十塋洋萍陂之原

孔閭檜妻郝氏舒城人事姑孝嘉靖時旌

孔希文女舒城人十餘歲立志不字後以老壽終於家

張崇舜妻朱氏寇陷舒城負姑潛匿稚子翼隨之夜行晝伏啖
草飲泉姑賴以生

奚氏女舒城人年十二母許氏病危割股肉進之遂愈先是許亦嘗割股以療其姑

生員曾灝妻孔氏曾永昌妻湯氏監生謝朝奉妻胡氏某妻宗氏胡三銓妻許氏皆割股療其姑生員王國銓女割股療其父俱舒城人

以上康熙志

沈維新妻張氏合肥人事姑至孝壬午城陷奉姑避賊姑病不能行謂婦曰我老不必慮汝當自爲計婦泣對曰棄姑偷生義不爲也鋒刃林立扶持盡瘁數與賊遇賊若無所見者衰姑得以保全夫病割股愈之鄉里稱其孝義

張智女廬江人許字吳修文未嫁吳病死氏矢志守貞年七十七卒雍正十一年請旌

賈子貴女舒城人少孤兄又早歿嫂遺腹生男女曰賈氏不絕者賴此一縷耳吾與嫂共守之遂終身不字以壽終葬洪家坂里人稱賈氏貞姑墓

以上縣志

鄭世俊妻左氏舒城人明末寇變闔室逃亡翁姑與世俊俱染疫病氏翦髮易藥療之俱痊以壽終

國朝

楊一丁妻李氏合肥人繼姑病篤刲股以療每年十月至二月與姑同臥起以熨其寒有淮南孝婦之稱

陳啟泰女合肥人許字蘇知非年十九未嫁知非從征滇南沒氏守貞不二年近五十卒里人爲之建坊名其巷曰貞女巷

丁澤光妻陳氏無爲人姑病氏刲股以救香滿一室姑病尋愈

大學士李天馥夫人李氏合肥人事姑張太夫人最孝病中刲肉和湯藥進之太夫人出鄉賢都御淳之後年未三旬卽爲夫娶副室瞿氏所生長子天馥也螽斯繆木之德凡再傳尤著矣

以上康熙志

李遇春妻巫氏合肥人姑病氏刲股療之姑病得愈子芾妻張氏明末寇亂避難遇賊芾以身蔽父幾爲所斃張身掖姑而受重傷人稱其孝

劉國正妻葛氏合肥人兩姑病篤葛先後刲股和藥飲之皆愈後姑卒葛哀痛成疾尋亦卒

文學楊寵女合肥人許字丁守庸以母歿自幼卽歸丁未成
禮而庸卒女年十八守貞不二歷五十九年乾隆五年請
旌

潘鼎母衛氏合肥人事孀姑極盡孝養姑病刲股年五十二
忽語家人曰某日吾歸期至矣至期無疾而死

余基達妻陸氏合肥人事姑孝姑病刲股療之獲痊壽延二
紀

褚雲女合肥人年十九父病劇女晝夜泣侍焚香籲天刲股
以進遂愈

梅桂芳妻馬氏合肥人事太姑竝翁姑盡孝翁病兩刲股和
藥獲愈

進士胡永亨妻祝氏舒城人事姑極孝明季奉姑避寇白下
囊橐蕭然甘旨不缺同里被難者百餘口多周濟之寇平
歸永亨得綜理舊業內助之功爲多焉

郡庠生郭士瑋妻衛氏舒城人本富室女知書值明季流寇
陷舒氏奉繼姑樊氏入山避賊虎穴薄暮虎突至氏以身
蔽姑虎驚駭疾去次日姑產男病不能行氏投已女於澗
負姑與叔奔卒免於難年七十八卒

任作噩女舒城人許字林中履未嫁中履歿女聞變哀傷成
疾就寢時顧父母曰兒生爲人依父母膝下死爲鬼將誰
依耶父母喻其意謀於婿家俾合葬焉

樊默茲妻朱氏舒城人家貧舅歿姑黃氏又善病氏旦夕侍

奉足跡不相離者十五年姑年九十三齒盡落病劇氏乳
之後姑歿氏哀毀成疾卒

生員周豐妻黃氏舒城人事孀姑至孝姑與夫俱病氏倉皇
刲股以進姑與夫皆愈

王來禱妻張氏舒城人姑病刲股和藥以進獲愈

監生江公錫妻朱氏舒城人性純孝翁病篤氏刲股以進而
愈後氏病劇其子泗甫十一歲亦刲股療之後公錫歿氏
守節以終

周之俊妻許氏舒城人性至孝姑病刲股療之夫病亦然
例監生陳萬言妻程氏舒城人性純孝姑胡氏病氏刲股以
進姑獲愈

舉人郭士瑛妻王氏舒城人事姑樊氏盡孝樊病劇氏割股療之獲愈後氏病其子婦蔡氏亦割股以療之

方元璽女廬江人許字葉文元未嫁文元卒女年十六泣懇往奠卽留侍孀姑守貞不二

孫世祿聘妻周氏無爲人未嫁婿歿茹苦守貞數十年雍正十年請旌

庠生張弛女無爲人許字俞雙知書工詩畫未嫁而雙歿女年甫十三矢天不字姑老且貧女常以紡績貲遣婢饋給無虛日年四十七而卒雍正十一年請旌

劉日吉女無爲人許字張世纂未嫁纂卒女年十七聞訃奔喪留奉翁姑竭力營葬守貞不二乾隆三年請旌

庠生王弓女無爲人許字張可權未嫁權卒女請往成服遂留奉舅姑守貞二十五年乾隆三年請旌

孫延嗣聘妻張氏無爲人親迎有日而延嗣歿女年十六堅請奔喪遂留夫家事祖姑舅姑極孝乾隆二十四年請旌黃瑞徵女無爲人許字胡謙謙卒女年十七往夫家守貞事翁姑盡孝值姑病篤割股和藥復親嘗糞後姑卒哀毀成疾數月亦卒苦志三十六年

吳天儀女無爲人許字夏茂旭未嫁茂旭卒女年十六聞訃往夫家服喪守貞不字父病篤女歸省割股以進遂愈時稱其貞孝

高月照女無爲人許字程正爵年十五未嫁夫歿女聞哀經

詣程哭奠遂留事翁姑守貞三十六年乾隆三十七年請旌

庠生章成志次女無爲人許字張之校未嫁聞校訃更衰經詣張守貞翁勸之歸女日兒爲未亡人來今安歸翁知不可奪爲立子嗣以守乾隆四十五年請旌

朱錦榮聘妻徐氏無爲人年二十二未嫁朱卒守貞三十二年乾隆六十年請旌

庠生劉宗弼妻李氏無爲人年十五姑病割股療之獲愈丁氏獄妻徐氏無爲人姑胡氏病篤氏割股和藥以進姑遂愈初胡氏事其姑亦曾割股云

邢肇功妻裴氏無爲人姑病氏親執澣濯不假手婢妾夫逝

危疾焚香額天願以身代隨亦病卒

岸生關大成妻朱氏無爲人姑病禱於大士前割股作羹以進姑遂愈

方士瑯妻燕氏無爲人姑病氏割股作羹以進姑遂痊

監生凌應彤妻邢氏無爲人姑病割右臂肉以療之獲愈後翁病又割左臂肉以療亦愈

職員裴銓妻朱氏無爲人姑病割股和藥以進獲瘳後值銓病割股肉投藥餌效之銓病立愈

宋明試妻孫氏無爲人姑病篤割股作羹以進姑病獲痊魯國興妻吳氏無爲人姑病垂死氏焚香祝天引斧剖脅割肝作羹以進姑病立痊氏夜夢神人納以紅丸一粒創口

遂合蓋其誠孝所感云

葛鍾妻周氏巢縣人夫病刲股救之不起姑病復刲股忽聞
異香噴鼻姑病遂愈氏嘗臥病聞翁病欲飲水氏匍匐汲
以供之人咸服其孝年四十九而卒

以上州縣舊志

吳修文聘妻張氏廬江人未嫁聞吳病死氏引繩自絕母救
甦矢志守貞長齋繡佛代母督內政家衆肅然至七十七
歲卒雍正十一年請旌

張氏女無爲人守貞不字乾隆元年請旌

編修李字青女李氏合肥人許字廬江宋嗣熙未嫁而嗣熙
死女年十四聞訃截髮自誓坐臥一小樓奉觀音大士像
桐城方望谿先生爲之作傳載雜文乾隆五年請旌

生員王朝璿姊王氏合肥人母張氏得痼疾女奉母誓不字人守貞至六十四歲卒乾隆八年請旌

李端聘妻楊氏合肥人年十四未嫁端聘服賈久不歸父母舅姑俱憐其少勸改適不從後端聘死女聞耗往夫家孝事翁姑紡績度日守貞三十七載

丁梅聘妻閻氏巢縣人未嫁丁遠出不歸女守貞誓不改字閻六十年乾隆十五年請旌

張學易聘妻芮氏舒城人未婚守貞乾隆二十四年請旌

李浴曾女合肥人許字宋和和沒氏年十六聞訃守貞四十七年乾隆五十九年請旌

以上府案

許襲薰女合肥人許字方琳未嫁琳死女年十七哀請奔喪

遂留事舅姑琳兄子少喪母女教養兼至鄉里賢之現年四十八歲

胡邦俊女合肥人許字殷三祝未嫁而三祝死女年十六矢志守貞足不踰房閭

監生唐仕清女無爲人許字楊同濬年十七聞濬死絕粒五日垂斃父知不可奪告楊迎歸持服守貞事翁姑唯謹今二十年

朱蘭芳聘妻張氏無爲人九歲童養於朱未成禮蘭芳死女年十九矢志守貞今五十四歲

方應昱聘妻汪氏無爲人年十二父母俱歿童養於方未成禮應昱死女年二十矢志守貞飲冰茹蘗孝事翁姑今三

十年

靳起柳妻黃氏舒城人事姑至孝姑病風痺氏左右扶持旦暮無閒姑沒凡所嗜物皆不忍食起柳嘗有疾氏割股療之獲愈及氏自病其子夢元亦割股療之後元妻倪氏子章墅侍夢元病章墅妻黃氏侍章墅疾皆割股焉

曾湧泉妻靳氏舒城人試用訓導靳夢元女也年十二其繼母周氏病危氏割左股療之獲愈越二年周復病氏又割左股療之及歸曾適曾得疾氏割右股和藥以進後數歲曾又病氏復割右股和藥以進竟不起時氏年二十七備歷艱辛不數載以勞瘁致疾卒

高薇妻王氏舒城人事舅姑至孝姑病篤氏割股以進獲愈

張道愷女合肥人性至孝以父母就衰矢志養親終身不字
數十年足不踰閭年五十四無疾終

朱世琢妻趙氏合肥人姑病氏刲股療之氏子輅娶袁氏於
舅姑病刲左右股和藥輅長子正仁妻程氏於姑病夫病
刲股亦如之

陳必倫聘妻吳氏無爲人未嫁必倫卒氏年十八閨計守貞
現年五十六嘉慶七年請旌

監生邢月英女無爲人許字廬江劉大帥未嫁劉歿女以死
誓請往奔喪立子守貞敬奉翁姑娶婦邢氏其姪也子旋
卒與幼婦共撫孤孫大帥兄瑞麟舉北闈鄉試間於公卿
贈額立傳現年五十一

葉秀南女無爲人許字李光箕光箕歿女年十六聞訃奔喪
守貞不二舅姑憐其志立于爲嗣年近八旬

州同張可法女無爲人許字廬邑沈於澍未嫁澍卒女往夫
家矢志守貞翁病嘗割股以進立愈乾隆五十三年卒

沈元輝聘妻程氏名應姑無爲人未嫁元輝卒女年十七聞
訃引刃投繯皆以救免乃衰經適沈終喪矢志完貞孝翁
姑不憚立姪承祧卒年五十四

何正坤聘妻徐氏無爲人年十二歸何爲養媳未成禮正坤
死守貞不二現年五十五

孝廉汪錯女無爲人許字監生季雨蒼次子未嫁夫飄泊爲
僧祝髮寄注示以渝盟氏誓死守貞侍養父母盡孝

艾志高聘妻丁氏無爲人童養未婚志高卒氏年十六矢志
守節卒年四十八

廬州府志卷四十

賜進士出身廬州府知府溫陵張祥雲主修

列女義烈一

漢

焦仲卿妻劉氏建安中仲卿爲廬江小吏劉氏爲姑所出自
誓不嫁其家逼之乃投水死仲卿聞之亦自縊

唐

朱延壽妻王氏舒城人延壽姊爲楊行密夫人延壽與田頔
通謀事泄行密詐爲書召延壽至執而殺之延壽赴召時
妻謂曰此行吉凶未可知日發一使以安我一日使不
至妻曰事危矣戒奴僕令守門捕者至則聚寶貨焚府舍

日誓不以皎然之軀爲讐人所辱遂赴火死

元

余忠宣公闕夫人蔣氏合肥人公守安慶時城陷夫人率其女安安赴井死維揚張毅云近考余忠宣公夫人死節姓氏太史宋先生傳書耶卜氏元史節要載耶律氏死節記作夫人蔣氏書記不一莫得其的因細詢忠宣姪孫宗烈云叔祖父有妾耶律耶卜氏叔祖母夫人賀蔣氏則知向者所書皆妾之姓氏也恐泯其嫡之貞節遂書之以示久遠

明

黔國吳威毅公復合肥人其妾楊氏及笄從復復薨時楊年

甫十七歲復殮竟沐浴更衣白經以殉事聞嘉賞封貞烈夫人詔從葬復墓下仍旌其門

漳國鄭忠毅公亨妾張氏合肥人亨薨張自經以殉詔贈貞節淑人

仰賴妻李氏無爲人賴故氏哀號竟日水漿不入口因自縊以殉本州上其事詔旌曰貞烈

張氏二女家合肥方山正德壬申春三月賊至驅之以行女相攜赴塘水死後得其屍手猶不解聞者咸欽其烈

以上
明隆慶志

吳一朝妻趙氏合肥人嫁期年而夫歿舅姑父憐其少勸令改適氏恐終奪己志局戶自縊事聞詔建坊

生員謝昌言妻詹氏合肥人昌言貧且病瀕危呼詹曰若艱辛萬狀可早爲衣食計勿守常節也詹泣請先死遂自縊未幾昌言亦死郡人黃道月爲之傳

生員任育民妻解氏舒城人育民蚤夭氏年甫二十許翁老而貧饔飧不給受某姓禮遣嫁氏哀號走匿舉家驚索竟自縊死

黃仁後妻胡氏舒城人年十七歸黃未及期夫歿次年生遺腹子數日抱以授姑從容自縊死合葬城西冢生連埋樹事在宏治中

陶憲臯妻汪氏舒城人居梅心鎮鄰有惡少某窺氏姿夜梯牆入氏抵死拒之大呼動鄰里惡少乃奔逸次日氏以首

觸壁掩面泣曰女子無聞外聲我雖不受污何顏復活越三日扃戶自經死惡尋伏法

丁氏女廬江人許字王子詔詔病歿女持服三年值歲大赦父謂曰汝以弱女子而稱未亡人今日旦夕爲餓殍盍擇一善所他適乎女泣謝曰女自有死所父潛許鄰子親迎有日女陽爲不聞一夕整衣危坐乘閒投舍傷井中時縣令以勸農至得女死狀碑其墓表其閭

侯一香妻潘氏無爲人一香早故里有富人乘其告貸挑之氏怒立還所貸富人復誘至家欲污之氏怒拔壁上刀自刺死血濺富人衣當道以其事聞於朝有詔旌其門富人伏法

以上明崇禎志

金

卷四
三
耆老殷尙禮妻潘氏合肥人事夫如對長上終身無褻容嫚語夫年六十患瘡割股進之次日霍然

高士俊妻孫氏合肥人年十七夫出貿易溺死氏聞自經胡一龍妻闕氏合肥人崇禎乙亥寇至被掠不辱投水死學使趙函乙妻解氏合肥人崇禎壬午城陷賊至隨母高氏赴水死後函乙側室胡氏媳汪氏俱以節稱

舉人趙觀乙妻王氏合肥人明末遇賊投水爲家人救甦聞夫被掠哀號絕食五日而殞

生員王之翰妻陸氏妾張氏合肥人夫亡守志賊至遇害舉人高士貞妻王氏合肥人壬午聞賊至令婢僕護二子一幼女出城誓死閨閣與長女投家園井中婢梅兒從焉後

幼女適生員許孫蒞亦以早孀著節

王希松妻臧氏夏聘功妻韓氏俱合肥人賊至皆不辱死

生員汪瑛母周氏唐經國妻董氏胡拱極妻黃氏俱合肥人以罵賊被殺

生員王時彥母湛氏妻張氏成允母陳氏其姒張氏蕭嗣傑妻葛氏胡璞母余氏俱合肥人寇至投水死

烈婦某氏合肥人壬午之變避難至縣橋遇賊投水賊下馬將掖之氏披髮大罵身中數矢死

生員錢如容母吳氏合肥人賊至侍老姑不忍去延頸就刃賊義釋之後以壽終

生員王驥妻趙氏程汝珍妻劉氏俱合肥人壬午遇賊投水

又王姓妻趙氏年十八死事亦同

沙棟妻張氏舒城人年十七嫁未及期夫死母諭以年幼恐不能終節張以死自誓是夕卽投繯卒

生員孔允禧妻胡氏舒城人壬午之亂遭難極慘後數十年過其地者往往聞哀惻聲

郭士行妻陳氏舒城人年二十五士行死遺二子後二子亦死氏曰我先不卽死者爲兩孤也今生何爲遂不食而絕徐道存妻方氏貢生萬運昌妻彭氏俱舒城人刲股療其夫黃家屏舒城人壬午寇難婦女五人同時投入深井越數日過者猶聞悲痛聲

生員任翼世母孔氏舒城人寇至隨姑張氏殉義妻祝氏亦從

容授井一門三世並稱節烈

胡太史守恆女舒城人未笄見父母遇害痛哭罵賊賊支解之又守恆妹適金生一亦罵賊死

生員汪士德妻洪氏舒城人姑年八十餘寇至扶掖出避賊前欲犯之氏堅抱其姑被殺有女始笄反刃擊賊亦被害生員曾賑昌妻漢氏舒城人太僕中玉女也賊劫之使從不應賊怒曰汝不去殺汝一家又不應與兩媳李氏黃氏俱死之

朱名遠妻方氏生員楊善妻程氏俱舒城人嘗以刲股聞竝死於賊

曾克昌妻謝氏舒城人賊劫逼令炊飯不從沃以沸湯亦不

爲動乘閒拾刀自刎死賊怒併殺克昌

曾之唯妻黃氏舒城人城陷自縊一女未笄賊至執其臂女大罵引刀自斷其臂而死

貢士趙振先妻某氏舒城人賊脅之不從衆環立鼓刀氏罵益烈一賊前斷其頸挺立如故

黃某妻胡氏舒城人年二十四被掠賊百計誘之氏厲聲罵賊賊斷其喉而死死之日人見其白晝至夫家語坐移時命婢當保愛吾兒凡生前未了瑣細一一囑之始滅

祝亮工妻桂氏舒城人避賊於春秋山賊見氏端麗前擁之氏抱一枯樹不動曰此吾死所也賊持之急氏哭罵被害頸已斷猶抱樹不脫後亮工至其手方解

汪世德妻楊氏在天經妻許氏姚永祐未嫁女生員李郁母
夏氏生母周氏俱舒城人聞變慮出門被污從容自盡
生員曾之才妻張氏候之楮妻胡氏江羅鯉妻孔氏張天鼎
妻單氏俱舒城人夫婦罵賊同死

汪孝誠妻祝氏年十九祝石門妻陳氏劉見鳴妻張氏年二
十餘俱舒城人以夫亡守節城陷時陳祝竝過古稀張已
逾八秩俱號哭自盡行路哀之

孔倚綱妻王氏生員汪大普妻曾氏舒城人賊至同時見殺
生員祝汝義妻耿氏舒城人少讀書通曉孝經列女傳夫亡
矢節賊至捐生

姚永著妻王氏黃爾新妻吳氏江致妻胡氏郭維慶妻許氏

監生祝長社妻李氏俱舒城人賊至同赴水中賊搜獲之
許顏色殊麗賊殺其夫擁之不從大罵投水諸婦亦俱罵
賊死又任科妻王氏有絕世姿其見逼與許同而死尤慘
酷

李楷聘妻張氏舒城人遇賊不辱被砍顏色如常曰乞再賜
一刀以全我節

江祥生妻孔氏賊至墜樓死貢生任民望妻張氏觸柱死張
振傳妻夏氏赴水死張士傑妻孔氏羅希聖妻員氏赴火
死黃應時妻傅氏徐自昇妻王氏張克恭妻陳氏朱嘉賓
妻金氏生員張國藩妻孔氏俱罵賊死任成治妻王氏沙
之繩妻李氏祝更生妻黃氏李才母黃氏生員胡永福妻

吳氏俱義不受污先後被害俱舒城人

貢生王孫謀妻張氏廬江人中書舍人永年太學生延年之母工部主事鳳鼎之祖母也事翁姑克盡婦道訓子有古慈母風崇禎乙亥正月城爲賊破張與鳳州妻姚氏俱死之延年妻呂氏賊至自投城下身被數刃已而復甦時稱一門三節云

劉芝妻張氏廬江舉人大受女也寇至氏先期與芝訣曰若奉母亟避妾惟有死耳因乘閒自盡袖攜觀音像一幅金剛經一卷芝爲殉葬焉

貢生姚履和妻丁氏廬江人城陷與妾談氏俱赴水死

趙天任妻徐氏毛可達妻姚氏曹二妻周氏俱廬江人年皆

二十餘夫亡守節賊至慘死姚以罵賊遇害死尤烈

謝容妻錢氏無爲人年二十七容卒氏號踊求死家人屢救得甦兄貫欲奪其志求死愈迫姑姆更續防守之一夕少懈自縊死

邢瑞妻林氏無爲人年十八于歸夫疾願以身代及卒誓以死從比葬觸棺死家人救甦終不食死

汪賜兒無爲人年十五鄰有狡童窺之賜兒不勝忿自縊死蕭貞白妻張氏無爲人崇禎十五年流寇至夫妻俱被執氏給賊使釋其夫遂詈賊賊斷其舌投屍烈焰僕蕭隨見氏死厲聲罵賊賊支解之

徐畢璋妻朱氏無爲人流寇破城朱方孕與璋妹奔井邊氏

曰井口狹煩姑推而納之朱旣下瑋妹哭曰父母安在吾伴嫂死矣亦隨躍入井中

陸官治妻沈氏無爲人年十八有少姑名蟾女年十四兩人最相愛聞亂指後園井曰我輩身爲女子儻有變此畢命處也寇至沈以嬰兒付保母與姑以巾帕相繫投井死經七日獲其屍衣履皆纏束完密不露寸膚

張景平妻朱氏胡羽王妻呂氏侍女桂喜石汝瓊妻蔡氏俱無爲人寇至溺死

生員劉光生妻朱氏畢力尙書張氏俱無爲人與姑同遇賊以計脫其姑然後自盡

趙崇仕女文姑無爲人許字沈可鑑賜賊被害

余承德祖母劉氏母張氏妻楊氏妹玉女皆無爲人崇禎壬午寇至劉氏魏氏被刃承德衛之同斃楊氏投水死玉女年十六罵賊不屈膚肉寸磔一門死難最慘烈

蘇蔭芝妻阮氏無爲人有營卒窺婦美逼之婦知不免給以就浴遂閉戶自縊死時年二十

張必美妻蕭氏無爲人歸美半載美卒氏年十七與姑王氏同婦鄰徐爾興強委禽焉氏堅不從爾興以勢脅之其姑懼禍氏曰我死禍卽已何懼爲遂自縊死

吳宗堯聘妻胡氏巢縣人于歸有日夫病死計聞女不食七日死

徐奇女巢縣人許字生員曹大復尙未及笄賊至遵父命從

容縊死

胡學禮妻徐氏生員徐奇妹巢縣人城破引刀白刎賊去復
甦數日而死

葛遇明妻尹氏巢縣人大婦同死於賊

李從仕妻嚴氏巢縣人爲流賊所執梟烈饑寒空遂投之死
趙宏勳巢縣人女佛兒年十五崇禎乙亥賊至執之女厲聲
罵與祖母熊氏同見殺

陶之令妻沈氏巢縣人賊至被執延頸受刃死

嚴成志巢縣人女五一兒年十六父與母陳氏與賊鬪死賊
挈之行大罵賊怒殺之一門三烈云

葉士彥妻陳氏胥氏巢縣人彥被誣死籍其產二氏攜手投

水死士彥輒歸與氏合葬遜谷旁卽士彥生前注易處以
上康縣志

庠生儲汝英妻王氏合肥人寇變赴水水淺不得死賊逼之
上岸罵不絕口引懷中刀刎死賊相顧愕然曰真烈婦也
邑人共捐金葬名烈婦冢

李蒼霖妻王氏合肥人壬午寇陷城旣殺其夫欲掠之婦抱
夫屍且哭且罵不屈死

庠生張天寵妻程氏合肥人寇變氏時居母家同婦母嚴氏
及弟妹避賊於褚家塘賊至遂投水死妹年十四許字許
孫鏐罵賊不屈賊怒斫其面死而復甦

生員張異寵妻吳氏合肥人十九值壬午寇亂氏扶姑至

東關小史港內以泥污其面匿城垣蘆葦中賊搜見命洗垢欲強之去氏罵不絕聲賊怒殺之

尹起莘妻崔氏舒城人壬午寇掠三河被執不辱死一女年十六亦投河死烈婦某氏張奇之妻某氏某妻王氏郭嘉瑞妻王氏汪大鼎妻曾氏烈婦許氏鮑麟伯妻孔氏張國屏妻黃氏俱同時不辱死

庠生黃廷衡妻傅氏舒城人流寇陷城時氏寡女先投井死兩媳及女孫亦相繼投井氏俟女與媳俱殞始從容入井監生王用善妻潘氏舒城人寇入執氏罵賊賊碎斫之子希曾嚎哭請代賊舉槍傷左臂時方穉人稱其孝

李應詔母黃氏舒城人寇變恐被辱赴水死後應詔建庵於

西山逢忌辰輒號泣奉食如事生竟以哀毀卒

王孫芳女舒城人壬午城陷爲賊所執不辱死

舉人張大受妻楊氏廬江人貢生張瓊磨母也崇禎乙亥流寇圍城氏慷慨泣下拊諸兒曰不復能相顧矣城陷賊入眾倉皇避賊氏直走宅後聳身立城堞上擲地而絕數日賊去家人從夾城中得其尸顏色如生

生員王祈年妻呂氏廬江人流寇充斥祈年攜幼子與妻出奔左提右挈勢不兩全氏欲全其夫與子遂乘閒觸石而死

衛童李青妻呂氏廬江人崇禎十年流寇至西鄉氏攜八歲幼子生謙匿馬槽山洞賊見氏少艾欲污之氏大罵抵死

不從賊脅以刃氏罵曰殺則殺耳何脅爲賊連刃刺之氏罵益厲四賊扛巨石擲之身首齧粉邑紳朱志靈避賊在對山親見之康熙十九年請於知縣盧天均表曰貞烈流芳

貢生王歷年妻盧氏廬江人壬午寇至氏年二十四攜二幼女匿母家夾牆中賊索得之時道傍有井氏給賊曰渴甚能以一瓢飲我得少蘇從汝可也賊因釋手翻身抱石投井而死賊怒連禦刺之井水爲赤竝殺二女婢冬桂目擊其慘傳於人至今人稱其烈

周氏女名畱姑廬江人幼許字邑人包某未嫁包病歿女聞訃卽更服往奠絕粒八日而死時年十六墓在西郊雙墩

口巡按洪公旌以詩曰未親夫而殉夫亡豈比尋常烈女
行白髮尙難堅晚節青年誰肯損紅妝魂歸地下乾坤老
名在人間草木香吾淚亦非容易灑哭渠千古撮綱常

周欽女周氏廬江人幼字張姓及笄于歸有期而張氏子歿
女聞訃悲號勺水不入口者數日父母溫語勸慰之女終
無一言惟日夕飲泣而已久之父見女無恙將別議婚微
示意旨女乃大言曰父命焉敢違但父曾以兒許張張已
死願往奠焉惟父所命許之至張墓哭拜畢復望家轉拜
曰兒將下殉張郎父其無以不孝爲罪遂觸石而死巡按
洪弔以詩曰所結同心侶泉臺媿獨存可憐甘誓死不忍
說分明血淚沾衰草黃昏慘墓門年年荒野月尙照未歸

白應時女白氏廬江人年十三字李氏子未婚而李歿女告
父母乞往奠慟絕數四乘閒自縊死

許越女許氏廬江人乙亥寇變遇賊於芝蔴灘義不受辱脅
以刃罵益厲賊怒以刀劃殺之身無完膚時年二十二
廩生劉曾妻呂氏廬江人于歸數月流寇圍城將出避氏指
倉下曰吾畢命地也舍此安適君速去遂屈身匿倉下賊
已及門夫急踰垣避寇還啟視惟白骨一堆而已

姚五峯女姚氏廬江人年十八字邢賓蘭值流寇劫掠同鄰
婦入山谷中賊搜得之殺年老者六七人獨畱姚氏逼歸
賊營氏不從投甘塘凹溪水死

周天度妻崔氏廬江人壬午寇變天度爲賊害氏不辱自盡
順治二年知縣周迓祥旌以額

慈繼嫂妻鍾氏合肥人夫早逝崇禎壬午流寇入城挈女與
婢往依母家遇賊擁之不辱同投水死

貢生蔡業峻妻儲氏合肥人寇至不辱死其族人蔡世模妻
靳氏蔡世纂妻董氏庠生蔡世和妻李氏寇至不辱俱投
井死

張華聘妻王氏舒城人幼而穎異長嫻禮儀壬午城陷爲賊
所執女罵不絕口賊怒碎裂之

王明俊字子文舒城人壬午城陷與妻鍾氏訣曰子與姪不
能兩全奈何鍾泣曰君勉爲鄧伯道可也遂抱幼子投井

死

東寺顏繼室陳氏舒城人攜兩子避難氏曰生者可無子死者不可無子也遂棄已子畱前妻子

季烈女無爲人陳氏僕女也許字馬氏子馬貧未能娶有武弁朱某與陳密見女美謀於陳出白金百兩償馬聘而已聘爲繼室陳許諾女聞之謂母曰主命不可違惟邀馬郎至家與兒一面可也嫗如言設酒食迎馬至女隨母出再拜而入檢篋中聘擲於庭大聲曰業已生離需此何爲馬泣而去女謂母曰馬郎無復再會幸遠送之嫗送近馬舍而返女已自經事聞州牧李春華爲勒碑

董國治妻馬氏無爲人崇禎壬午流寇掠州之北鄉氏被執

賊悅其色欲污之氏拒罵百端以頭觸賊刃血淋漓仆地
賊怒剗其腹而死

周培忠妻張氏無爲人壬午流寇掠北鄉男女皆奔避氏以
夫病篤不忍離爲賊所獲悅其色欲攜之去氏且哭且罵
賊以槍戳其足昏絕仆地更火其廬與夫同焚死氏時年
十九

貢生宇道達妻耿氏無爲人鄉飲賓耿大化女年十七適道
達明季壬午有流寇之警先期自誓曰脫有不測吾惟一
死及城垂破遂投河死時年十九

張岳生妻鍾氏無爲人文學鍾成樂女一日寇猝至懼不免
遂投水死時年十九

以上州縣志

徐錫印妻朱氏成國公純臣女錫印嗣永康侯爵卒朱樓居
十餘年足不履地及流賊陷京師捧廟主自焚死

胡中恆女舒城人許字張阿閣城陷罵賊賊支解之

張姓婢鄭氏又某氏婦孫氏俱合肥人張奇之妻朱氏胡太
和女俱舒城人生員黃秉元妻某氏生員潘景黎妻陳氏
潘一鳳女潘玫妻朱氏何大知妻徐氏女何氏總智氏喬
氏時氏楊茂儒妻馬氏女楊氏生員李應甲妻劉氏趙昌
言妻王氏妹趙氏負販妻某氏俱巢縣人賊至不辱死以
上江南通志

